

E funcion a haci masha hopi trabao pa e isla

Koningin Wilhelmina Fonds ta cumpli 30 aña di existencia na Aruba

ORANJESTAD(AAN) -- Dialuna dia 4 di Februari 1991, Stichting Koningin Wilhelmina Fonds (Kankerfonds) pa combatimento di cancer na Aruba, ta cumpli 30 aña di existencia.

Den e trinta añanan di existencia di e fundacion, trabaonan importante a worde haci riba tereno di combatimento di cancer en general.

No solamente ayudo financiero pa e patientnan di cancer tabata e meta di e fundacion sino tambe duna informacion amplio riba e diferente tipo di cancer cu ta existi.

Debi na e bon contacto cu e cuartel general di informacion di "Nederlandse Kankerbestrijding" na Amsterdam, Koningin

Wilhelmina Fonds tabata ricibi cu frecuencia "brochure" encunto e diferente clase di cancer.

E "brochure" tabata worde deposita na hospital, den e consultorio di especialistanan y den e sala di espera cerca dokternan di cas, pa asina tur hende por lesa encunto cancer.

Tambe e fundacion a ricibi

"brochure" y "poster" encunto e consecucionan di humamento di sigaria di "Stichting Volksgezondheid en Roken" situa na Den Haag.

INTRODUCCION DI MAMMOGRAPH A DUNA RESULTADO

Un di e proyectonan grandi di e Koningin Wilhelmina Fonds na añanan 70 tabata introduccion di e "mammograph" pa hospital. Cu e "mammograph" por descubri cancer na pecho hopi trempan y asina por trate.

Na Aruba a registra hopi caso di cancer na pecho. Pa yuda e patientnan di cancer na pecho na 1981 a bin cu e proyecto "borstprothesen". Cu ayudo di e "hoofdzuster" di Wit Gele Kruis hopi patient di cancer na pecho a worde yuda cu "prothesis" y e "brassieres" correspondiente. E "prothesis" ta worde traha na Francia y importa for Miami. Un total di 118 muher a worde yuda cu e sistema aki.

REGISTRACION DI CASONAN DI CANCER

Na 1983, Koningin Wilhelmina Fonds a ricibi un invitacion di American Cancer Society pa asisti na un symposium na Miami. A keda constata cu Aruba tabata carece di un sistema di registra cancer.

E fundacion a tuma contacto cu Pan American Health Organization (PAHO) cual nan ta miembro y PAHO a duna nan instruccion con pa traha un registro di casonan di cancer.

Un bon registro di casonan di cancer ta importante ya cu despues di algun aña bo ta determina exactamente cuanto caso di cancer tabata tin y cual tipo di cancer ta bin cu mas frecuencia riba e isla.

Al fin al cabo, na 1984 a cuminsa cu e registracion riba un asina yama "kaartsysteem". Na 1987 Kankerfonds a busca un computer y a entrega esaki na e departamento patologia di Laboratorio. Cu e computer por a haci e trabao mas rapido y completo.

Tres dama di e directiva di Kankerfonds, bao direccion di un experto di computer a keda simannan largo ta traha riba e computer pa asina hinca tur e informacionnan encunto cancer cu ta data desde 1977. Actualmente e departamento patologia ta encarga cu e registro di casonan di cancer.

DONACION DI MACHINE PA HACI PAPTEST MAS RAPIDO

Riba recomendacion di e patologo di Laboratorio, un di e analistanan cu ta traha na e departamento di patologia a worde manda Miami pa sigui un curso special pa detecta cancer den sanger. Esaki tabata un exito.

Pa aña Famia Planea ta ricibi un enorme donacion pa sostene e proyecto di paptest. Despues di a pasa un pelicula encunto cancer na baarmoeder, e cantidad di paptest a crece enormemente.

Na dado momento e cantidad tabata asina hopi cu a constata un retrazo den e procesamiento di e paptestnan den laboratorio.

Pa alivia e situacion, Kankerfonds a duna e departamento Cytologie di Laboratorio un machine automatico di color cu ta haci cu e paptestnan por worde procesa mucho mas rapido.

CENTRO DI INFORMACION

Na 1987 Koningin Wilhelmina Fonds a haci un centro di informacion na Paardenbaaistraat 8. Nan a tuma den servicio un trahador social kende tabata duna tur informacion encunto ayudo financiero ora un patient mester worde manda den exterior.

Bao su direccion a organiza un vez pa luna un reunion entre e patientnan di cancer na pecho pa asina nan intercambia di idea y experiencia.

Recientemente e centro di informacion a muda pa Hospitaalstraat den e edificio di "Geneeskundige Dienst". Tur Diaranzon desde 8.30 or te 11.45 or di mainta, un enfermera ta na disposicion di un y tur.

FORMA PA KITA DOLOR

Na comienzo di Maart 1989, e directiva diario di Koningin Wilhelmina Fonds a worde invita pa Prinses Wilhelmina Fonds di Curaçao pa asisti na un symposio relaciona cu nan 40 aña di existencia.

E symposio tabata mas bien encunto e forma pa elimina dolor cerca patientnan cu ta sufi di cancer den e estado final. Na Hulanda e sistema aki a capta hopi atencion.

Na e symposio a hiba palabra Prof. Dr. Meyler, neuroloog-farmacoloog di e asina yama "Pijnteam" di e hospital Academico na Groningen.

Ta asina cu Koningin Wilhelmina Fonds tin hopi bon contacto cu Prinses Wilhelmina Fonds di Curaçao. Ta asina cu masha hopi patient di Aruba ta worde manda Curaçao pa radiacion.